

“Ladin, fundamenta dl sistem scolastich trilingual”

Intervista al president dl comité de evaluazion, Lois Ellecosta

La Usc di Ladins: Encuei, dapò ot agn, èl vegnù sclut ju ofizialmenter l laour dl comité de evaluazion. Cales é pa vostes sensazions personales?

Lois Ellecosta: Sce an é boggn de scluje ju val' él samben davignora na gran sodesfazion. L comité de evaluazion à porté inant n projet che à doré per ot agn alalongia; encuei podonse mostré su i resultat dl laour che i on fat y chest è dret positif. Les publicazions che i on dé fora te chisc agn é na garanzia, che porta



“Podei scluje ju n laour dà dagnora na gran sodesfazion”, à dit l president dl comité per l'evaluazion Lois Ellecosta. (foto: Alfons Facchini/ Igloo foto)

pro che chel che i on fat ne vegnes nia desmentié.

Cie importanza à pa chestes publicazions per les generazions che vegn do?

I dac elaborés dal comité de evaluazion ne n'è dldut nia definitifs. Ie me imagineie che al vegnes fat n laour analogh te n valgugn agn, a na maniera che i dac cueius adum fina sen posse vegnì integrés, per vedei i mudamenc che é stés, capi cie che an fej endertura y cie che an podessa fé da micc. Ma i pense ence che al messessa vegnì slarié fora i criters de evaluazion y che al messessa vegnì valuté ence d'autri aspec dl lingaz. L'oralité, una dles componentes plu emportantes dl lingaz, ne n'è per ejempl nia ciamò vegnuda touta en considerazion.

I eis dit che dal 2008 inant él vegnù valuté dantaltut les competenzes linguistiches di scolés. Cala é pa da vos enfora la valuta de n sistem scolastich trilingual? Y dl ladin te scola pa? Ne n'è pa fosc nia la lerch lasceda a nost idiom dla oma n pue' limiteda al intern de chest sistem?

La emportanza dl ladin é grana, al é rodunt nost idiom dla oma che tegn en pé l sistem scolastich trilingual. L ladin é la fundamenta dl sistem y al fossa perchel da

potenzié. De na gran valuta é spo samben l trilinguism, dantaldut te na region che é, o che messessa ester trilinguala. Nos ladins, sce i volon vive bon te Südtirol, messonse conesce endertura duc i lingac, ence l talian y l todesch. L trilinguism fossa da ti consié a duc canç.

I eis lascé entene che la colaborazion anter i comités de evaluazion dles trei realtés linguistiches ne n'è nia steda massa bona y che duc é jus do a si troi. Co vedeise pa chesta colaborazion tl davegni?

Nos on na gran speranza che la evaluazion vae tl vers de na colaborazion anter ladins, talians y todesch. I son davignora stés dla minonga che l sistem de evaluazion essa messù ester un soul. I on dampruma fat la proposta de mete su un n comité, i on prové de mete en pé grups de valutazion mescedés, ma ala ne n'è nia juda; perempò é duc jus do a sia streda.

Sentieise pa n pue' de encherscedum sen che l projet é vegnù sclut ju ofizialmenter?

No, chel ne pense nia che i sentiré. I laore da passa 50 agn tl mond dla scola; dapò tant de agn ne pòl nia plu encesce. (Intervista de Katia Pizzinini)